




紹述先生文集

七

和16
1495
7

早稻田大學附屬
圖書圖
寄第
漢詩文
第 號
第 卷
此書館外不許帶出



和16
1495
7

紹述先生文集卷之十三

男善韶 校

墓碑銘類

正庵先生渡邊君墓碑銘

君諱宗臨字道生姓渡邊氏號心庵產于日向州延岡其先世仕于土持氏土持氏既滅居于州之東海祖曰圓秀始遷于大武時郡守高橋右近使監大武清高島考曰益西隱德不仕有馬侯直純致于延岡客遇之妣長末氏君其長子也幼而沉默好學成童



遊京師就時名師通儒醫術時承戰爭之餘文教掃地且鄉處僻遠人不知學君孜孜教導久而信服受業百人日誦詩書君之力居多至侯子康純欽其術業使侍嗣君日勸講經籍裨益弘多既而嗣君寵昵嬖臣中外離心君與其傅切諫不聽遂逐其傅併錮君居二年遷于本莊遂歸鄉不許遣他邦接士人君亦不樂官仕茅屋三間鬻藥自業時年四十餘奉母導子弟日倘佯乎花塢清泉之中以待終焉之期其詩曰活計田三畝義皇千古心十年何所得松竹四隣深又曰半畝丘園半畝池更無塵事到茅茨山間

明月清風外一二病夫來請醫元祿己卯八月十日終壽六十九葬于善心寺君天資萬實孝恭廉退不苟詭隨行義著聞鄉邑欽服嘗書忠信萬敬玩物喪志等語以自警雖其流離顛沛之際未嘗忘其君也娶黑木氏子男五人長曰榮嗣其業次曰玄隆繼其父玄俊之後餘皆夭女一人亦夫榮在洛受業于家君與予有雅素之故使予叙其世系行義之大槩予亦及識君也故不辭而系之以銘云
西海之隅兮爰毓偉人欲稽厥德兮質諸貞珉
年辛巳

礪野竹巖墓碑銘

先生諱貞政字竹巖姓礪野氏初曰彦兵衛其先出於六條判官源為義第十三子淡路守義次義次之裔刑部貞友方明德應永間始城于江州礪野而居曰姓礪野世為江北著姓其後若干世丹波守貞昌於君為高祖徙于佑和山城以武幹名貞昌生貞次字勘三郎娶海北氏元龜中父子從淡井長政與信長公戰于姊川大為所敗退住于礪野貞次生吉次字新右衛門娶橫山氏吉次生和乃字新兵衛娶佐野氏始上都住新在家乃君之父也以承應三年甲

午九月二十三日生君于新在家宅君長而為志勉學聞古學先子之講道往而受業既而從壽元院法印生島道竹學醫能精其術延寶庚申之歲以尾州大塚性海寺住持賴景君之叔父也往而寓焉遂徙于名護屋其術大行元祿十五年賜法橋位娶太田氏先卒子男二人貞重貞元女一人寶永五年戊子十一月十三日終于家享年五十五貞重請予題其

因係以詞云

誅暴夷亂武之善經救天愈疴仁術斯成其業雖殊其施乃宏惟君之先世以武名君承厥後醫藥以精

嗟善順時乃播家聲

淨泉院鳥居侯墓碑銘

國之將興也必有股肱心膂之臣折衝禦侮克夷大
 難以底平定其子孫世胙茅土與國同休戚苟非文
 武兼資乃心國家豈能耀其先德以澤後葉乎惟侯
 諱忠英初名忠救平姓鳥居氏叙從五位下任播磨
 守後改伊賀守世為德川家之世臣食邑三州碧
 海郡渡理鄉六世祖諱忠吉叙從五位下任伊賀守
 逮事贈亞相廣忠公及東照宮初東照宮在駿州
 時尚幼齡左右擁衛屹為羣寮之長高祖諱元忠稱

彦右衛門每從征討所到著功受封總州保香取郡
 矢矧管内岩崎城食邑四萬石慶長庚子之變留守
 城州伏見城城陷死之曾祖考諱忠政叙從四位下
 任左京亮亦從東照宮累著戰功慶長七年壬寅
 移封與州保磐崎郡岩城管内平城食邑十二萬石
 時台德大君就郡中新創一寺曰長源寺祀元忠
 以旌其節附祭田百斛元和八年壬戌移封羽州保
 最上管内山形城加封二十四萬石且以庄內新庄
 上山三鎮九二十六萬石地分封侯之姻戚以為之
 副併侯所食凡五十萬石以為東面藩屏卒世子忠

恒嗣叙從四位下任左京亮襲封寬永十三年丙子卒無嗣國除以弟忠春為嗣新封信州保高遠城食邑三萬二百石叙從五位下任主膳正於侯為祖考卒世子忠則嗣叙從五位下任左京亮襲封乃侯之考也妣森氏美作侍從源長繼朝臣之女元祿己巳左京君卒侯時年二十五有故徙封能州食一萬石及八年乙亥教旨錄長源侯之功且褒侯之器業加封至二萬石移鎮江州水口城寶永二年乙酉掌贊謁之任時稱奏者兼監寺社訟理之事時稱寺社奉行斷決明恕公而不蔽其所平讞人無遺恨正德元

年辛卯參預大政時稱若年寄寵資優渥殊蒙眷注二年壬辰加封至三萬石移鎮野州壬生城六年丙申三月二十一日嬰病而卒于官舍享年五十三娶松平氏薩摩侍從源綱久朝臣之女先卒子男三人長曰彦千代次曰富太郎次曰熊一郎女四人其一適牧野備後守源成央餘俱夭以弟丹波守忠利為嗣侯天資粹美夙有英譽孝友之行動於親闈左京君最所鍾愛既襲封儉以奉身惠以澤人治繁理劇不告其勤其使人也各適其器釐務之暇延禮師儒時講經史商推古今治亂人物成否且練達武事最

長射御，平常警子弟，曰：吾世蒙國厚恩，以至今日，皆祖先之遺澤，唯願爾輩夙夜儆戒，勿忘忠孝。忠孝既立，則萬善自立，其他言行可記而傳也。其卒也，僚寮親黨以及羣下，莫不感悼。越四月某日，葬與州長源寺先塋之次，從遺命也。既而丹波侯錄其世系行治之畧，使伊藤長胤記其事于石，因撮其大旨，系之以銘曰：

有國虎臣，曰長源君。風雲契會，爰樹偉勲。侯承之後，世濟其美好。文躬武惟德之履，入贊大政，輿議允與。出涖民社，厥職克舉。弗光其施，胡逝之速。豐碑不泯。

奧山之阿

正德六年丙申六月廿一日

原芸庵墓碑銘

君諱永貞，姓原氏，號芸菴。寬永二十年癸未，生于播州姬路。其系出自源滿仲，子多田，法眼源珍珍之玄孫。曰清俊，清俊之子季範，永久中為播磨印南郡志方，地頭稱原河內守。子孫世襲其職，官隸赤松家。範之後十八世孫諱朝重，天文十八年卒。於君為高祖。朝重之子重永，重永之子信重，信重之子長上，乃君之考也。赤松氏既滅，失其食封。及松平下總侯鎮姬路，長上始仕本鎮，甚蒙任遇。既而罷仕，在攝彌泰菴。

有子四人君其季也妣黑屋氏既長徙京師師通仙
 院法印瑞堅肆醫又受儒術于宇都宮遜菴後從吾
 先子問道夙資剛介不苟詭隨意所不可面折不置
 惡巫祝妖異之事如視蠱賊志尚恬淡終身未嘗丐
 醫階故學富術精達甚晚及中年其術稍著及晚大
 行病子市于門自宗親勲舊之家以至四方藩國每
 遇重疴多迎致以求治頻奏奇効聲名藉甚於一時
 享保元年丙申八月十日卒于家壽七十四娶葛野
 氏有子男四人長其大次其大善長次善材女二人
 長適常賢次適光茂越某日葵知恩寺善長亦從子

學來丐銘其墓曰系之辭

君之從吾先子兮在我未生之時我既強而君逝兮
 銘君墓我其辭享保元年歲次丙申十一月

松光孺人黑柳氏墓碑銘

孺人諱孝姓黑柳氏世為遠州橫須加仕族曾祖諱
 某事東照宮從軍每為先鋒頻著戰功祖諱某屬
 紀藩南龍公居紀州田邊考諱重之字一郎右衛門
 跡覺圓仍仕紀藩補先鋒隊妣壽貞孺人荒川氏慶
 安四年辛卯五月廿八日生于田邊夙稟慧質不好
 嬉弄凡爾婦紅習不煩督既長適紀府監安藤君步

隊將松本定章克孝克順能盡婦道父母舅姑相繼
 淪喪哀戚之誠前後如一平素樂道人之善恤人之
 患直而慈儉而施治家有法勤而不怠故家亦不至
 告匱最為乃考所鍾愛定章在同策中有能吏之譽
 亦內助為多有子男四人長其久次曰定代以蔭補
 署先死次曰之純次曰順政冒姓成瀨氏皆宦紀府
 女三人長適玉置氏先死次適渥美氏次次其教男
 子則曰先公而後私當官事雖遇親疾而不顧女子
 則曰務柔順從勤儉故成能成材宜其家人既寡號
 松光賞花玩月時誦古歌以自娛平素念浮屠經薦

親識之冥祐然有才識而不囿於理之所無享保四
 年己亥十二月七日無疾而逝享年六十九墓南面
 山勸修寺之純家武弁而亦能知嚮學將碑其淑德
 乞文于予因銘曰

子之賢多資乎母之賢家之治乃本乎內之治使其
 夫為良吏而其子為秀士者豈非婦而克婦母而克
 母之所致耶斯德斯名永世罔墜享保六年辛丑夏五月

雲州廣瀨宰矢野君墓碑銘

君諱勝清稱木工右衛門姓矢野氏祖考諱某仕參
 議忠直卿在越州參議公次子少將直政朝臣始分

封雲州因臣事焉考諱某稱久兵衛嚴父祿補職妣
山崎氏有子二人君居其長以承應元年三月七日
生于雲州寬文七年少將次子上州公近榮東觀教
割雲州地支封廣瀨君偕父隨往未幾署職領度支
掌刺舉司管轄帥卒徒督群士皆稱其職遂參庶務
隨節觀江戶者往反無虛歲元祿十五年上州公告
老子式部公近時嗣尋卒其子隼人公近朝嗣先是
傳焉居一歲命為室老賜采三百斛釐務多年闔府
信服常抱盈滿之戒屢請致仕不允享保四年己亥
九月十六日以病卒于家壽六十八十二月某日葬

于本州金花山洞光寺先塋之次娶佐原氏□□之
女子男二人長□□次□□君夙稟謙抑勤而能和
不苟隨象不苟絕惡事上忘其私御下體其心孝親
睦族輿誦歸焉考妣年踰耆耄尚強健務奉輕煖以
盡歡心其大節所立如此故主眷彌渥謂良士也不
可多得病甚親造其宅勞問殊摯迨葬遣人會葬四
方來吊者亦皆嗟惜焉及來請碑紀其世系行事之
大畧因係之銘曰
爰有良士雲土之域孝著于家忠聞于國執德有恒
髦士攸則欲載其德惟石惟勒享保六年辛丑夏六

月日

渡邊元安墓碑銘

君諱榮字元安姓渡邊氏彌通真子其先世居日州考諱道生攻吏扁術有能名仕本州延岡城主有馬侯妣黒木氏君承家學既冠來京師受業于吾先人在等輩中以勤篤稱兼學醫于有馬存菴能傳其術遂家于京救療有年叙位法眼既而罹癰瘻疾享保七季壬寅二月二日卒年五十九配尾崎氏子男女各一人皆夭遂葬于紫雲山其弟玄隆來自日州請予銘其碣云不要虛美但紀其鄉貫世次之大畧使

後世有徵予也定交向四十年固不得辭因係以銘

曰

業兮雖勤未策其勲嘗凌滄波終宅紫雲

道可先生貝君墓碑銘

君諱守鼎字春東姓貝氏彌道可其先居肥後祖考忍了官在大坂慶長之役避難往日州延岡遂家焉考諱某號宗圓字諸左衛門娶小石氏生一子乃君也既長上都學醫術于平井法印春澤傳丹溪立齋之法歸鄉回生起廢厥績居多君天資質樸不阿時貴既老賦詩詠歌或從某伴或棹扁舟以自適娶伊

藤氏有馬侯世臣之女子男二人長曰清從子學有
才次曰誠之女二人長適松浦某次未嫁享保七年
壬寅七月四日卒于家享年七十九墓于北街三福
寺先塋之次因係之銘云

攻軒岐術澤覃蒼生日州之域永傳厥名

持軒先生五井君墓碑銘

先生諱守任字加助藤姓五井氏其先出于左大臣
魚名公公之孫十世諱守貞任民部大輔其弟曰守
康康之裔家和州五井戶鄉遂氏焉高祖諱守恒號
信山曾祖諱恒久號道貞祖考諱守香號禪久考諱

守純號淨隱妣那須氏先生其第二子也寬永十八
年辛巳二月二十二日生于攝州大坂幼為祖考所
鍾愛義方惟至逮成童遊學在都其所尊信者仲村
陽齋先生而先子亦與焉貝原二先生及松下栗栖
八尾等諸老皆其所友善者也初學醫方於向井元升
中島長安二子療一婦人方劑不遣乃歎曰將以治
人反致人死遂改業為儒在京十餘年歸大坂時府
下人士講學者罕先生訓誘多年人知鄉義本多能
州侯時鎮和州郡山聞其名行聘致之觀其風貌古
朴歎曰難波之士風尚奢侈處之四十年不改其初

豈常人乎乃請講論語詞吐朗暢辨論明俗侯大悅
服初宗朱子之學極其尊信晚年稍有從違論性專
就氣質為說然其授徒不務辨駁略述大旨屬纊前
一日名一門人將遺囑舌噤不能言乃援筆臥書曰
勿與偏執者爭辨唯肆罵詈無益於己夙有至性侍
乃考病誤觸褻器先生大駭敬而移之壯時家道饒
阜為親眷所掩而不問及晚遂致窘迫乃曰若無人
相恤則死耳淡泊自守晏如也簡牘往來常揀敗紙
用其空白以暴殄天物為戒天資坦率不修邊幅不
飾辭說平生不曾言人之惡或與人語言或不當亦

不斥之但曰其所不解閭閻鄙俚之言多所不解苟
及問學誨誘懇至不解不已曾謂人曰某胸中未嘗
蓄一惡念又曰人不能為惡者也有書生遽曰吾
輩不能然先生正色曰不意君之為人乃爾惡若可
作試為之家傳日本紀學治之尤精不雜迂怪不經
之說又嗜和歌不務瑣鏤敏而有理娶香河氏子男
三人長曰孫太郎次曰純實次曰純禎女一人適
水谷氏享保六年辛丑閏七月十八日終于家享年
八十一越三日葬于天滿鄉九品寺先塋之次府下
之人知與不知莫不悼惜純禎世其學以予之嘗

及知先生命叙其世貫行義之大畧仍系之以銘

云十一歲入學大業研精微言提誨有方

遭時熙洽高蹈丘園潛志大業

研精微言提誨有方

岡部先生高伯墓碣銘

君諱快意字高伯小野姓其先世居于武州岡部鄉因氏焉曾祖考廣房祖考房忠考忠勝妣鮫島氏元和七年辛酉生于越前府中夙志軒岐之道與兄道的肄業于延壽院道三之門壯而徃福井務濟民瘼播國暨之名寬文二年大安公嘉其治術召仕醫局

君天資萬實奉職匪懈眷遇日厚加田至三百碩子

素孝親睦族務恤貧困有病而無告者廣施藥劑墟

落之間或遇草餒振之衣糧嘗申于府創一草宇養

濟國之窮民免其暴露每且薰盥懇求真祐誓廣仁

術以裨治化元祿四年七月二十二日疾終于家壽

七十二遂葬于本門山妙經寺娶根本氏子男二人

曰養竹曰玄伯皆為本府醫官子少不及識君君之

二子皆受業於先人諸孫亦從子遊欲更立碑于萬

松山大安寺後岡見託之銘曰其事狀叙世系治術

之大畧以銘云

著良醫名夙仕越藩躋民壽城澤覃後昆享保八年

癸卯九月

三友軒都筑君墓碑銘

君諱以真字市左衛門姓都筑氏其系出自鎮守府將軍藤原利仁卿十一世孫從五位下民部丞諱利用始分族為都筑氏丞十一世孫諱以祐字藤一郎乃為君之曾祖世仕德川家食邑參州花曾根邑四百碩地東照宮時每從征討頻效汗馬之勞元龜三年武田信玄渝盟宮遣諸將會戰于遠州吾師將退敵躡其後勢殆猖獗以祐還拒之于一言

坂殪敵數輩領其部而歸宮大嘉獎給感狀一道并賜佩刀一腰躡月山者以旌其功是歲遂死于味方原之役祖考諱某稱內記隱晦不仕終于參州妣鈴木氏考諱以正在江戶補步軍隊士寬文中為京都所司與力隊既老躡竹菴妣瀬戶氏君襲其職服勤京府三十七年質直勤慎始終如一且志嚮聖賢之道禮師儒講理義不苟焉而止致仕西郊泉谷營菟裘而居啜茗栽花常耽文籍以自娛曰躡三友軒又扁曰自責皆其志也享保八年癸卯三月十五日嬰疾而終享年七十二遂葬于泉谷西壽寺娶山口氏

名述先生文集

卷之十三

世系譜

子男一人曰以道襲其職女一人適澤和吉林君參
吾先子之席屢聽講論既沒以道見託銘其墓為叙
其世系志行之大略系之以銘云

畿輔之衛惟國之鎮乃恭其慕勞不顧身老子山阿
志慕先民有隆者碣以告後人

享保八年癸卯九月日

圭齋字都宮君墓碑銘

享保九年甲辰八月廿日字都宮君文甫卒于京師
僑舍年四十八踰月子由已亦殞唯有遺孫曰希道
生僅半歲親朋適在京者相與經紀後事立小石碑
間銘于予曰諱三的稱一角文甫其字也考遜菴諱

三近妣山本氏未娶養飯田氏之子為嗣曰由已惟
昔遜菴先生學于松永氏之門講經授徒久在輦下
人所師尊君夙承家庭之訓兼從先子遊天資樂易
善與人交家世臣事吉川家于防州岩國鄉人嚮學
君有力焉近者患痞積之疾就醫京師携由已來使
從子學日夕親炙志銳業勤庶幾其克繩祖武以成
偉器不意相繼淪謝聞者莫不惋惜銘君之墓亦由
已之志也因系以銘曰

生于華京終于華京家于周防宦于周防一經尚存
遺孤蕪焉欲訪芳躅視此岡阡

享保甲辰冬十月

福謙齋飯田君墓碑銘

君名棟隆字玄泉姓飯田氏號福謙齋源姓飯田氏其先出于信州與座光寺氏同宗世為名族祖考正之稱七次郎隸武田信玄累著軍功一時與座光寺其守濃州岩村城城陷遂家于京師韜晦不仕以翠竹院道三其從兄弟也肄醫傳其秘旨乃焚所習兵志一意于軒岐之道改名宗泉號本立庵考意春號東庵又善醫妣秋庭氏三浦義明之裔而世仕于山名家君夙攻醫術研覃內經壯而益肆披覽洗剔舊弊大有所得最通張氏傷寒論有麻黃桂枝方藥附

子等論藥品修治意創特精天資清介不求知於當時終身未嘗申請醫階然人信其學識沈疴篤疾必求診候不問貴賤都鄙當時語良醫必稱焉與先人友善先人疾篤亦請治正保四年丁亥八月十五日生享保十年乙巳六月五日卒享年七十九配近藤氏子男二人長曰正恒次某女二人遂葬于京師慈眼寺以子有通家之契請銘其墓曰系以銘云

先在信州世蜚英聲隱德三世其道之享業耽墳素志薄華榮遠邇仰止幾人回生

享保十年乙巳六月

小林童子碑銘

童子名直八小林貞幹之子也貞幹世籍于江州膳
所管下少壯好學最信先人之道時時造都講討比
日久不相見問諸其鄉人則客冬喪長子既而持其
事狀丐碑其事則童子亦神童也天性強記甫三歲
稍辨文字祖父母最鍾愛之望其成器文籍器物題
字試易而示之百不差一敬父母知禮讓衆所愛重
享保八年八月廿二日生以十三年十二月廿六日
罹疾而夭享年纔六歲可惜也夫遂葬于本州別保
村西念寺銘曰
穎乎才畱乎齡吁不朽徵斯銘

檀上處士墓碑銘

處士諱正明字宋右衛門姓紀氏武內之裔御豐後
十二世棟清跡檀法印子孫因為檀上氏後七世諱
清氏永祿中屬三好長慶麾下守河州譽田城戰死
時九年十月十五日也自是子孫隱而不仕住河州
八上縣後徙攝州大坂其玄孫福近乃處士之父也
處士天資淳懇夙知嚮學私淑吾先人之道于中江
岷山翁崇信殊薦常懷倡導之志享保十四年己酉
七月四日罹疾而終年三十三元部氏之所出也先
娶中西氏繼娶與西氏子正誼尚幼異母弟生德及

親友經紀後事可記其世行于石因為銘云
潛于草莽學以宏才爰伐堅珉論諸方來

井上元俊墓碑銘

君諱元俊字四郎左衛門姓井上氏其先家于菽長
二州之間高祖某仕于毛利侯元就以功受邑曾祖
諱某彌道林稱田原氏妣妙行院宗戶氏隆家之孫
有二子長曰元昭次某乃君之考也元昭事輝元卿
甚見親待有故辭官游東越復姓始仕于松平忠山
公為大番衛騎士及公受封于駿啓督鳥銃手其移
封于遠之掛川丹之龜山皆從焉後遂為旗將受祿

三百斛妣仙壽院妙久孺人某氏右馬允之孫也孺
人生三女子男子唯庶出一人遂以君為嗣元昭卒
繼其祿食二百斛初為典謁後領步卒督先鋒鳥銃
手某年常憲大君臨公策督修有功加祿五十斛
以正保四年生于駿州享保七年月日卒于信之上
田享年七十六子男二人長曰直元繼其祿次曰宗
政為篠原氏嗣女二人長次義女一人適能勢本
立君天資溫恭廉而有信自幼勇悍衆所畏愛母氏
齒向八袞色養無闕人稱其孝常恨不讀書學問勸
其子從學平素誦前世忠義遺事以最兒孫事君極

其誠敬書自君所來及公事押署每必著公服疾革
曰世荷洪恩恥糜廩祿精爽不違安然而逝乃墓于
城西向源寺之後林直元信予先人之道亦君之所
嘗喜也曰命予碑其事乃系以銘曰

出于西藩宣于信城事母致孝事君致誠澤覃後昆

褪身荷榮表斯幽窈不朽厥名享保十五年
庚戌夏四月

伊藤木菴先生墓碑銘

君諱貞亮字廣宅姓伊藤氏號木庵其先世居越州
伊東天正年間來家角鹿祖考淳慶府君諱某祖妣
妙意孺人考淳意府君諱某字九兵衛本姓安田氏

為外祖母伊藤氏所養遂冒其姓妣妙慶孺人松田
氏有四男子先生其第三子也寬文三年癸卯秋八
月十四日生自幼記憶兼人敦尚墳籍及長遊于京
師學軒岐之術于名古屋氏名古屋氏使其徒受學
先人之門君與焉時年三十餘歲丹之笹山侯幣名
為母孺人不欲乃歸鄉業盤收名生徒講學三十餘
年其為人也寬綽愛人不事矜飾鄉人愛之晚得痼
疾起屋不遑門人恐其勞屢請頤養先生耳若不聞
秉燭展卷欣欣然不自知其身之病也享保己酉四
月先生疾革寄書府士某氏蓋以曾有忘年之交遺

書述道德仁義之旨云三日而卒則夏五月二日也
年六十七卜墓于角鹿邑西門人負土作墳誌銘其
碑因系以辭曰

曾學軒岐鴻術兼導鄒魯遺則志示人以周行庶躋
民於壽域享保十五
年庚戌

烏山見菴墓碑銘

君諱守道姓烏山氏號見菴考長庵世籍于攝之吹
田業暨君甫六歲隨父徙越之府中既長遊京師受
業吾先人之門與小河成章友善又受醫術有馬存
庵子叩其秘與既歸鄉人爭求救療多有奇効不屈

於顯貴不忽於寒賤有禮則往不告其勞人以此稱
之前此越人不知汗下法君倡長沙之旨近世陋習
為一洗推為國手常使其徒兼儒學以謂不明儒術
醫事不成倡導古學人知嚮方君天資朴直不苟詭
隨孝義自將廉而且儉毀譽不嬰於懷謗訕不形於
言購書以遺子孫賦詩以陶性靈衆之所親愛莫不
悼其亡所著有三世經驗方二卷婦人經驗方奇効
方各一卷娶並河氏子男五人長曰宗元次二人次
共常次宗成正德元年五月十日卒年四十八墓于府
中正覺寺以予之相識最奮託銘其墓因系之辭曰

尚古象賢學以裨身起死回生術以濟民魄掩黃壤

德輝玄珉享保十五年歲次康成七月日

敬簡先生墓碑銘

先生諱質字心淳姓大町氏號敦素其先出于武州祖諱某考淨宣府君諱義親妣貞淑孺人中村氏以萬治二年十二月十五日生于京師夙入先人之門肄業天資謹厚好讀書有通儒之名處世不競聲譽接人不說短長淡泊自守晏如也既老樂育生徒多就其材名重於播紳之間深蒙知遇後為小泉片桐侯見禮給之稟籟娶佐治氏子女一人男二人濟經

濟綱享保十四年十一月十日卒于家壽七十一門人私謚曰敬簡先生墓于城東真如練若請碑其墓于伊藤長胤曰銘云

夙敦詩書翹楚儒林精爽千年宅茲翠岑

妙泉孺人伊藤氏墓碑銘

妙泉孺人姓伊藤氏高祖安利右近大夫小笠原侯忠政之孽子也有二子長曰利行次曰利成利成為伊藤某所子遂冒其姓元和初元難波之役從小笠原侯長安有功後奉事幕下老彌道齋其子利始仕于有馬侯康純于日州延岡寬永中島原之役多獲首

尚古象賢學以裨身起死回生術以濟民魄掩黃壤

級後號圓心有一男先夭養外孫林田氏子為嗣曰
利興事有馬侯永純有違言而去孺人其季女也長
嫁貝道可三四人長曰清毅父業為醫次曰誠之仕
大久保山州侯于鳥山孺人以寬永五年生享保十
六年終享年六十七清從子學巧子銘其墓因銘云
武弁之胄爰來媿賢有子克家世澤其綿

鶉殿隅州碑銘

君諱長春字和卿姓鶉殿氏初稱民部後稱大隅世
為曰侯之宰食邑曰州浦富其先出自中將藤實方
實方五世孫為熊野別當湛增增之子其始居新宮

鶉殿邑因氏焉其後移參州蒲形為州之巨族兼食
新宮其後裔長忠居西郡柏原城隸今川氏麾下後
奉仕東照宮有四男二女長女侍宮號西郡君生
良正夫人始適北條氏直長忠之子長次以外
家之好媵焉北條氏敗夫人再醮參議池田輝政卿
卿卒忠繼嗣夫人請于公上招致長次自是臣于池
田家食邑五千石有子五人曰長堯長直長重長之
長義三子留居江府長之長義臣池田家寬永九年
侯自備州移鎮領因伯二州隨徙焉長次告老長之
襲祿配池田氏長明之女荒尾氏嵩就之子長之歿

長定嗣相仍稱大隅配荒尾氏成直之女有子男一人乃君也女子一人適荒尾成康君以萬治四年己亥五月廿一日生於因之私第甫六歲侍子江府明年始奉謁公上元祿十年長定致仕侯乃命君襲世祿掌國務十六年關左大震江府城壘多圯官命諸州牧伯修築因侯預焉侯乃使君督理明年甲申功竣公上賞其勞動賜賚優等侯亦設宴酬以衣服名刃累請告老不許享保元年冬與告二年再掌國務既以衰老請告者數矣許輿而出入城門十五年冬十月病劇十二日卒于正寢享年七十二葬浦富邑

與市山先塋之次初娶備州宰池田武憲之女先卒再娶同寮津田元長之女亦卒繼娶松平政武之女無子養同族長政之子長喬以為嗣君為人博聞強識嚴而不苛和不流自奉甚儉宰國務三十餘年每隨侯東觀或主留務孜孜裁決未嘗告勞執事平允國人服焉官暇讀書手卷或至天明時延文士討論賦詩平素未嘗為言之疾色之遽也聞其歿者無貴賤無不盡傷君嘗信先子之道通問者有年矣舉世之士大夫執事而能不自負其學者必稱君既歿其府之士錄官世行治之畧俾予銘其墓隧因係之銘

云

羽林之後，熊螫食邑，世不乏人。業顯功立，昌運丕闡。羣雄景從，乃祖知命。附鳳攀龍，惟君襲職。因之鉅室，文濟之武。名副厥實，豈曰弗壽。人尚怨天，派芳千載。桓碑巍然，事保歲在壬子秋七月

伴忠進碑銘

伴生名存，誠字忠進。筑州久留，米管內醫家之子也。父曰元庵，弱而嗜學，稍有才器。遊學京師，就予肄業。生理艱難，抱疴遊于攝泉之間，遂終于浪華懷德堂。享年二十四，享保癸丑二月廿三日也。親友經紀，其

事葬本州誓願寺，因銘其墓云

藏器於身，忽焉玉碎。間值之難，千古同慨。

田中源內墓碑銘

君名親長，字源內，姓田中氏。號東泉，其先江州士族也。生于京師，考諱親賢妣小川氏。君有至性，克順父母，弱而耽文籍，有志於斯道。既而入先子之室，服事終身，強記洽覽，為人所稱。享保十七年壬子八月廿三日，以疾終於家，壽六十八。門生經紀後事，私號曰文逸先生，配某氏，無子。以弟之子敦長為嗣，屬予誌其幽窆，因銘云

予嘗見君之受教于函丈未幾見君之授徒于家庭
爰瞻鬻封宿草其生勤銘題字曷勝其情享保癸丑秋
八月書遣

土岐元長墓碑銘

君諱元長姓土岐氏世貫于京師考諱玄伯妣藤原
氏既長習醫受業于益壽院元桂法印救療多効大
興其家任醫官叙階法橋終身不娶無子以其弟元
辨為嗣元辨嘗師中島淳山翁兼從予遊通儒醫術
頃者來告曰予兄平素質直好義不詭隨於世此其
所立別無他長以貞享元年生享保十八年七月十
四日不祿享年五十願銘貞珉以表幽宅予亦嘗訪

元辨因得相面乃銘曰

濟生以可利人好義以不失己揆其所立殆進於技

今津恭菴翁墓碑銘

翁諱兼忠字甚四郎姓今津氏世家于江州高島縣
今津邑以邑為氏考諱忠勝字甚右衛門妣中井氏
意三之女也寬文五年乙未十一月廿七日生于家
弱冠喪考妣既長襲乃父職仕于賀藩掌三邑事天
稟恭順振恤勸誘村民賴焉娶安原氏伯正之女男
一人希誠女三人享保十八年癸丑正月十一日壬
辰終于家壽六十九越十四日葬邑西七本松先塋

之側別號恭庵嘗遣希誠從予學屬者希誠請銘其墓予亦嘗識其人熟其行事因系之銘曰

潛迹隴畝理茲編氓催科不擾撫字有方遺愛在人表諸幽堂享保癸丑之秋八月

伊良子翁墓碑銘

君諱好在字道牛姓伊良子氏號無逸先生其先在羽州山形仕于最上家後徙肥後熊本仕于細川侯子孫支分居肥前長崎君夙業瘍科人稱妙術卜居城州伏見三十餘年救活甚多生于寬文辛卯除日卒于享保甲寅正月十二日享年六十四遂塋于仙

石谷元配森村氏有二男一女皆夭繼配山川氏亦卒生二男長曰好問世其業次曰好賢又娶梅原氏無子君深信吾先子之道嘗使其二子從子學焉不唯其術之可稱蓋亦薦志之人也因銘其墓云

重道義辭世榮妙方術壽蒼生一片石表佳城吁卜載不朽名

鶴溪子墓碑銘

鶴溪子名末茂稱造酒姓度會神主世為勢州山田祠官其先本於天牟羅雲命其後若干世而有諱末俊於君為曾祖其子末為其孫末保相繼嚴職叙從

四位下君其長子也延寶五年甫三歲叙從五位下
 貞享寶永 新天子登極每賜加級累至從四位上
 自幼耽學強記超人逮壯遊學皇京周旋儒紳之間
 嘗及吾先子之門爾後稍間造京訪故舊討文籍歲
 以為常正德初韓使來聘攝津接譚詞鋒稱瀾其所
 獎異且懷山水之癖肆其登陟近道名勝蹤跡殆遍
 勢州邑里殷富人物亦盛問嗜學之人必以君為稱
 首其所著有杜律評叢鶴溪雜記分韻詩選等書詩
 文集若干卷或刊或藏于家其子末濟亦後子遊近
 狀其事行巧子碑之則延寶三年乙卯正月晦日己

丑其生日也享保十八年癸丑七月十九日戊戌其
 卒日也周曉孺人小川氏其嫡母也精仰孺人龍氏
 其生母也內田氏石崎氏其元配及繼室也未濟榮
 春其二子也三鄉山者其先壠而君之所安厝也曰
 系之辭云
 詩書宿好林泉高致存順沒寧表茲幽隧享保歲在甲寅
 山田麟嶼學博墓碣銘
 嗚呼天之降才何其艱而才之遇時亦何其艱而非
 假之以年則亦無以効其用而宏其施甚矣士之成
 功難也嚮有人言有才子崛起東方年及舞勺善屬

文巧草隸粗涉書史聞者為景星鳳凰之想莫一快
觀未幾而又傳用薦者擢署學職累被眷注聞者共
傳以為文運之方亨而材賢之不遺既而同景胤維
章兩生西上觀光京華時造救廬云將從受業緘默
少言器度如成人文采煥發固不虛其名時享保十
年冬十月也在京閱歲時與薦紳之英文儒之選唱
酬追隨日相過從以資麗澤之益俄而聞親病東歸
爾後竿牘往來屢見記存聞其進脩不怠望其克成
偉器以無負國家育才之盛意何圖日景胤書來計
云卧病不起聞者惋惜不問識與不識又錄其門人

源友輔所述行狀致乃翁之意屬予銘其墓云君諱
正朝後改弘嗣字大佑系出于丞相管公分族為山
田氏尊人李蔭先生宗圖寶永中昭廟命為世子侍
醫階法眼大孺人志井氏正德二年生于東都昌平
橋南宅生而警悟不好弄甫六歲能讀國字書冊賦
和歌亦可誦七歲讀論孟五經旁通子史不煩課督
佔俾晝夜讀書之室曰尚古堂既而修文辭操華音
旁學古樂才益秀記聞益博名譽日益隆時耆儒徂
徠先生稱為千里駒彌麟嶼以獎之學博鳩巢先生
尤所器許將上薦剡享保九年甲辰年甫十三是歲

七月六日教有司曰正朝齒尚髫年才茂而業勤且優之餼粟以玉其成乃給歲俸二百以為學資補負儒林踰年請假三年將學于京蒙允將發九月八日被召對進講關雎一篇聞者竦聽睿獎親喻汝說詩亦能解頤聞汝善病今將遠行自將護玉音丁寧舉朝嘆羨遂遊于京師越明年丙午秋還君素羸加以末疾不能出門卻掃誦古者十年所今春患瘧危篤三月十九日卒于家享年二十四某日葬于谷中南泉寺云予既異其才之超乎衆亦幸其身之達乎時而竟惜其年之不永今審其行狀則嘗所聞而見者

實而益詳故及其丐銘懇而不已因行狀所述撮其大者作之銘請鑄之墓系之以詞曰
夙抱圭璋之器幸丁熙洽之辰吁青雲兮致位慨黃泉兮早淪欲知死而不亡來茲徵諸玄珉

駒井的庵墓碑

君諱□□姓駒井的庵其號也世江州人嘉曆中其先尾張守山内氏賴叙從五位下其子從五位上近江守滿高始監駒井城以駒井為氏滿高之後若干世而至諱可次者乃君之考也妣□氏可次初鞠于舅氏松田某遂冒姓為松田氏初事水戶侯侯子讚

岐太守受封之國群臣陪從考亦與焉自是遂仕于
讚州太守屢命嗣職君以多病辭乃改業醫適洛師
林市進尤精其術又受學于山崎闇齋既而省親讚
州遂居焉頃之妻逝子夭鬱鬱不樂益無求於世退
隱獨處自彌心山居士元祿五年正月二十一日遂
以疾卒于讚州享年□十□君性行端慤素善書平
生怒罵不形於面聲色不瀾於側志操謙冲虛懷有
禮每以重名教蹈軌範為務固君子人也生遭不幸
且嬰憂疾不永厥天此為恨耳噫娶坂川氏先卒子
女一人曰某六先卒無嗣養叔父可利子為嗣曰道

節道節託其所識求銘君墓因為述其世次操行之
大畧系以銘曰

南讚之山兮維子所宅德輝貞珉兮形歸窀穸元祿五年仲夏

渡邊君順正墓碑

君諱玄俊字新右衛門姓渡邊氏日向州延岡人考
諱益西妣長末氏有二子長曰宗臨君其季也君性
資質直少馳馬試劍有士人風後傷家道衰謝克起
其家賑貧惠孤親黨稱之為郡豪族城主有馬侯康
純嘉之恩遇異常命使為鄉長娶樋口氏無嗣養兄
子女隆為嗣兼育妹子玄誠屬家事元祿九年丙子

九月十五日終歲六十彌曰頌正鄉人聞之莫不感
涕遂葬于郡善心寺東南疾革尚名子姪訓戒誨以
勿墜名勸行克繩祖武兄子元安亦蒙君愛護遊學
于洛受儒業于仁齋伊藤先生醫于卧雲有馬先生
皆克有立與予相識故命予記其行事世系云

平井東川墓碑

君諱德建字春益號東川本姓安福氏後冒姓平井
其系出源滿仲之裔滿兼十七世孫內藏助淨憲食
邑河州安福縣遂氏焉憲之孫宗昌徙居于濃州不
破縣室原邑昌之子諱什德於君為高祖德之子諱

什豐豐之子諱什政政之子諱什慶世在郡為望族
君慶之第二子也踰冠遊學寓京師受醫學于饗庭
東菴之門又從宇都宮遜菴及吾先子肆儒術寬文
六年贅得壽院法印春澤之家為婚改姓平井氏拜
醫官累階至法眼元祿丁丑仕紀藩為醫員奉職六
年致仕歸京正德五年乙未正月四日卒享年七十
四元配先卒繼配日比氏子男三人長曰喻義次曰
龜先天次曰冬栢女三人長曰麟造春原宣成次曰
松造藤原嘉重皆先卒次曰荀未嫁孫男女若干人
越某日葬紫雲山先塋之次私謚曰安節先生

享保三歲次
戊戌春二月

井原道閔墓碑

先生諱主信字道閔姓井原氏筑前人也夙攻醫術
氣精素難後家于京師治療之暇兼講醫書受業者
甚夥享保五年庚子十月廿三日卒壽七十二私謚
曰順英先生墓于本國寺是歲門人某等以先生嘗
信予先人之道屬予誌其墓云
享保十二年十月

龍田善達墓碑

攝有一隱士姓龍田名在寬字善達產于播州加東
縣山國邑夙耽墳素向壯遊學于京師信吾先人之
道親炙于中島浮山子既而寓于攝州大坂橫經授

後者二十餘年著錄殆以千數天性恬易能耐艱苦
棲遲衡門不誕榮利人以此稱之京師戊子之災萬
室煨燼隱士亦遭燬羸服間行予遇諸塗勸寄予宅
而不肯前年聞予到攝而速來訪則道奮而不措何
圖宿昔門人早瀨某來訃曰今茲六月廿三日嬰疾
而不祿享年五十八一丈夫子甫六歲一女三歲無
人主後事門生若干人合謀經紀將伐玄珉以傳姓
名請為之誌乃題其墓曰龍田善達甫墓云時享保
十九年甲寅歲也

三木平右衛門碣

翁諱時春稱平右衛門姓三木氏備州岡山之產也其先播州士族徙居于備至父宗俊居積致富翁天資寬厚和易善與人交講禮容詠詩歌以自樂每歲春秋必上京以為恒享保十四年己酉五月十九日終壽五十四墓于歌中山號曰宗有居士子男一人曰貞成女一人早世子於翁無一日之雅且深信浮屠之教窺真宗阿字之理則固異其所好而貞成嘗上京造敝廬有志于聖人之道故及其請誌撮其大略以表墓云
元文元年丙辰夏六月

南川小碑

松崎千之字萬佐南川其號也父曰祐之仕篠山掌文學事千之夙稟英邁遊學京師寓于舍踰年興病歸本鎮卒不起時享保十五年庚戌七月九日也享年十有八嗚呼惜哉

戶村君墓碑

君諱愛忠字惣右衛門號恒齋姓戶村氏其先出於與州世仕三浦侯家祖考諱某妣某氏考諱某妣某氏寬文甲辰七月十三日生于武州江戶既長襲父職為侯家長臣事上臨下思盡其道蒞職有年不墜令聞享保七年壬寅七月九日卒于三州刈谷官舍

年五十九娶北大路氏子男三人長曰□□襲祿次
曰□□次曰□□女一人

紹述先生文集卷之十三終
父曰... 母曰... 妻曰...
... 卒於... 葬於...
... 諡曰...
... 墓誌銘類

紹述先生文集卷之十四

墓誌銘類
恒軒先生稻生君墓誌銘

男善韶 校

君諱正治字見茂攝津州大坂人其先源氏之族也
居波波伯部城因以為氏焉曾祖諱某任越中守祖
諱重信掃部頭仕豐臣氏食河内州石川郡上加納
下加納平石等邑死於難波之役考諱重治字五兵
衛與同列數人抗戰于京橋口將死之俄命大兵解

卷之十四
古義堂藏
圍悉逸敵兵得以不死娶和田氏有三子君其季也
慶長十五年某月某日生于大坂外祖母縮生氏以
其父美濃守宗貞無後以君肩縮生氏既壯學醫師
古林見誼研精覃思殆忘寢食誼每嘆其刻苦以為
醫得其人畢授秘旨業成東至江戶聲譽籍甚沒侯
永井尚往聞而聘名後侯移封丹之宮津君隨焉世
子尚長襲封恩顧彌篤延寶三年春告休時侯起明
善堂以教吏民就堂側賜宅一區常就講道義六年
病歸于大坂八年正月丁巳卒享年七十有一遺言
送終之儀畧倣古禮煩鄙不經之儀一切不用是月

己未葬于大坂天龍院君性行敦篤天資孝順節儉
振卹大為族人知奮之庇平居簡重寡言怒人愛物
動遵禮義樂人之為善晚最好通鑑綱目大學衍義
家禮心經等書初寒隆暑手不釋卷恒以晚進於學
歲月難挽為恨日教導子弟示以學術要領不屑世
之勢利紛華疾篤講學不已洞視死生有如晝夜又
嘗刪定劉氏玉機微義古林立菴最服訂正之精又
承宮津侯命述益斯草一卷蓋小君胎養法也以謂
婦人能正其言動謹其視聽無少邪念則疾祥隕祉
產育得寧本古人胎教之法欲其勝邪侈以節動作

今刊行于世子弟有欲傳其術者皆不許曰吾幼家
窶不能供甘旨欲以技養親學于醫幸洞病機諳藥
性為世所信周給族人得遂初意因奉親之誠也學
醫不精適以害人况有經術可學以致遠者何屑小
技乎娶河瀨氏子二人長曰宣義以儒學仕于賀藩
次曰正路元祿九年丙子三月十日改葬于洛東迎
稱佛寺宣義屬其友伊藤長胤誌其世系行事錢鏞
勸詞貯以石函藏諸幽窹銘云
武弁之裔爰業青囊遍救民瘼厥績維彰英聲茂著
敦聘造閭嘗仕汶城又隨宮津玉機是刪益斯有草

篤信聖賢晚彌好道其嗣維賢鴻業式紹令德無窮
視此宅屍

稻生君續河瀨氏墓誌銘

孺人諱春姓河瀨氏曾祖壹岐守祖新右衛門考外
記妣上田氏元和五年十一月某日生于江戸五歲
喪母事後母柳谷氏一如所生孝順婉婉尤得歡心
既終撫育諸孤慈愛懇到幹理家事咸得其宜常曰
先君性嚴自幼奉承欲適其意雖勞不倦故既長歸
于稻生君終始敬慎不敢少怠謙遜自卑克盡婦道
曰人或以我為愚此吾所宜舅姑在大阪孺人自江

戶每裁書問候甚得其歡心後徙沒則舅沒矣事姑
期年奉養最摯性儉素不尚華侈事苟利人必竭其
力役使婢僕悉加恩意且善婦功補紉裁縫不一委
于人至於書問往來貨器餽遺暨造一器製一衣皆
設簿銷注弗敢少失最謹祭祀之禮朔望忌日必灑
掃盥沐手執饋奠整肅竭誠有異味新果必謹封藏
至期乃供或遇私親之忌唯心哀之耳其儀不敢比
舅姑乃曰為婦之道當如此也早喪母氏不及詳知其
其事乃問之于人畧得其世系始末性行內治之大
槩錄為七冊且所以事父母舅姑修身理家之道亦

具焉平生念觀世音菩薩常誦其經亦崇信儒術最
好朱子小學書謂子婦之道盡於是書又有女誠一
篇和歌數百許首後家道中艱殆及困約恬焉安處
未嘗有戚戚之色教訓子使讀書勵行聞其所交者
賢則喜故各自勸勉皆有以成雖嚴君教誨之所致
而孺人蒙養之力亦多元祿八年正月八日終于城
京寓居壽七十七預裁後事作文公家禮自製衣衾
屬託詳悉無有所遺又有訣其子妹書數通貯諸一
囊及沒視之皆脩身治家之要纖微罔遺讀者莫不
感泣是月十二日塋神樂岡東迎稱寺明年六月其

子宣義屬伊藤長胤誌其世系行義之大槩饒諭勒詞藏諸壙中銘云

於戲孺人河瀨其氏媿德娠賢內治斯美上孝舅姑下恩臧獲既嗜儒雅兼崇經籍無非無儀壺彝攸範維正維淑凜不可犯神岡之左爰宅其魂佳城葱鬱式裕後昆

迂晚庵墓誌銘

君諱達字成卿初名範信號晚庵姓迂氏本姓源野呂氏其系出于惟喬親王王之後十四世諱氏隆叙從四位下任上野介文永中自野州來于勢州城多

氣縣五箇山而屈焉子孫遂為勢人氏隆之後十一世為野呂伊勢守房隆房隆之孫大炊助將忠於君為曾祖其後仕于因州者數世君之舅迂信之無子鞠君為子仍冒姓迂氏幼而聰慧強記超倫甫六歲詠和歌未成童善屬詩既長而好學服宋朝儒先之說而不安聞吾先人之倡古學而投刺來見遂定交焉貞享三年回侯命補儒職賜俸若干執經進講頗蒙恩賚凡府中每有簡牘往來畫誌著撰必命裁定國侯及諸公子命名君必擬進貴威宗老莫不尊信元祿中從侯東觀在江戶隸林祭酒之籍與修釋奠

禮其後告病家居者有年矣。年。卒年。墓于。娶。氏唯一女子而無嗣。養柳川氏之子信倫為後嗣。業信倫從子。學請銘墓。隧嗚呼天下好學者鮮矣。予尚及見君之嗜學如人之嗜利。孳矻白首好。訪異書而不問。質之有無。如君者吁。亦難得矣。因系以銘云。

山陰之山兮蒼蒼。山陰之水兮滔滔。惟子之德兮與山不墮。惟子之名兮與水不竭。

小林順性翁墓誌銘

翁諱貞隆字彥治姓小林氏世居于江州膳所其可

考者彌道心於翁為高祖曾祖考正慶妣妙蓮湯淺氏祖道慶諱真正妣壽心八田氏世行賈羽州起家至貞正凡三世貞正魁貌美髯有拳勇且嗜連歌平居啜茶寫字以自遣無子以弟秋道子貞繁嗣業貞繁天資曠達直而愛物為邑保心人多賴焉妣谷邨氏翁其子也翁天稟溫良敦朴克勤邑中祠宇傾圮者戮力葺理架橋梁夷險阻賙窮卹匱唯務利人自少至老無日而不往于田曰庶菑畲勤動以無負覆載生成之恩娶與村氏心重之女子男三人伯叔皆夭仲曰貞韓女五人柴山氏坂上氏谷村氏其婿也

其二、天翁既老，號順性，附家務，貞韓退休，自適。享保十八年癸丑七月十八日，嬰病而沒。享年七十九，葬于岡山東墟。貞韓夙嗜學，信服吾先子之道，研磨遺言，亶亶不已。及其石，碑乃翁義不可辭，乃撮其世行之大略，俾鑿諸墓上，曰系之辭云：

大江之游，惟子之鄉。佑其鄰里，扶持有方。力田沒齒，家道殷昌。逸民之懷，安茲玄堂。享保十九年甲寅冬十月誌

菽藩家老小鷹狩晚山居士墓誌銘

君諱元方，姓源，分族曰小鷹狩氏。稱勤解由其先出首尾。州君夙有器局，延寶二年春始宦，事菽州牧源

拾遺紀伊侯年尚成童，既而署侍衛職，任遇漸隆，祿秩有加。拾遺公卒，至今羽林安菽侯襲封。正德六年夏，命掌國務，執政十六年，歷事四世，加秩至千八百石。享保十六年告老，嫡子元周襲祿，嘗設別墅曰觀瀾亭，時偃息焉。州牧時或貴臨，給俸復獎，君執政之間，盡心釐務，兼嗜文籍，時或操觚，崇善斥惡，衆心服從，亦可謂君子人矣。享保二十年乙卯八月十九日，終于家，享年七十六，葬于州治西南淨國寺，娶竹本氏，有三男四女。君嘗慕吾先子之道，講究遺言，以自樂。延及子，屢蒙書問，元周仍俾子銘其墓，因係之以

銘云
蘇迹尾州顯名，菽藩班貴。多士裕及，後昆夙敷。古道每誦聖言，幽宅有銘不朽者存。

岷山先生中江翁墓誌銘

昔先君子家居，倡道四方。有志之士，百舍重趵。來受業者，不知幾千人矣。環堵蕭然，戶外之屨常滿。先子不嚴條約，曷施夏楚。羣飲於河，各足其量。當時諸子或務博綜，或專修辭，才雄而名播。時中江翁自伊州來，則齒尚壯，夙夜孳矻，研鑽往聖之微言，木訥少文，不為人知，而不肯改其故步。既而諸子或取世資，或

領生徒，身達而業廣。則翁時艾矣，憤世閔俗，放言自適，不肯易其宿志。寶永中，挈家寓于大阪，以其所得告之同志，則既老矣。時時造都，必寓予舍，唯以倡明古學自任，辨析痛快不少。假借嘗著理氣辨行于世，又著四書辯論若干卷，疏其所見，甚為精詳。皆其三十年來日夕考究所得也。妻北村氏有賢行，客冬罹病，綿惛逮春卒，不起。翁家無扶持，困頓殊甚。是年六月十日遽卒，則享保十一年丙午也。享年七十二。既葬一二同志叙其世系，屬予誌墓。曰：君諱一貫，字平八，後更稱快安，姓中江氏。彌岷山，其先出志賀源氏。

瀧川但馬守一成之曾孫也天文中瀧川長門守一
 基守尾州長島城其弟長保之子一成與左近將監
 一益為從兄弟且其姊夫也保中江城天正中賤嶽
 之役一益軍敗一成遂變姓名號中江平兵衛隱于
 江州安土一成生清玉清玉生景次乃翁之父也相
 繼家于伊州上柘植村其先固將種也翁有子不育
 唯一一女適田原瑞安門生等經紀後事為立碣于
 一心寺系之以銘云

力扶斯文志存填海其書滿屋固窮曷悔

享保十一年
丙午臘月

立所先生小河君墓誌

天之賦命於人有賢愚壽夭窮通之異而其稟焉者
 參差不齊故賢者宜壽而達而愚者宜夭且窮焉而
 常不可必豈天之優於愚而蓄於賢也耶蓋賢之與
 壽與通三者皆命之難得者也若賢者既得其一而
 又欲併其二而兼享不亦何求於天之無已也耶所
 謂以其間值之難則其數或不能長者信矣然天道
 福善禍淫則不克無憾於吾立所先生之不壽且達
 焉先生諱成章字伯達一字茂實或作茂七郎世家
 于洛其系出自武藏守藤原秀鄉秀鄉十世孫諱政
 平者始分族為小河氏政平十四世裔曰吉盛於君

為高祖事將軍源光源公府。號承盛。承盛生光種。事大和。大納言豐臣侯。號紹務。娶小島氏。紹務生吉勝。號紹榮。紹榮生以安。字莊兵衛。別號省。字乃君。之考也。能書。好古。多寫蓄奇書。不貲。生產於予。為父之執。妣有馬氏。御醫法印玄哲之女。亦好書。嗜倭語。真正有操。沒稱貞懿孺人。以慶安二年某月某日生。君于洛陽挑華坊西洞院。里生而不允蒙。養有助省。字君。雖家門衰謝。不逐勢利。慨然欲使君以儒興家。及成童之歲。與弟成材。使受業於吾家大人之門。已為等輩所憚。隱于洛西北野邑。攻苦食淡。衣敝屣。陋讀書。

自娛。日造大人之門。群論討究。爰有年所。既壯。僦宅洛下。開門講經。教育生徒。予時未冠。日夕造扣。讀孝經及左氏通鑑等書。時定學規三條。揭諸齋壁。其一曰。反求於己。勿責於人。二曰。忠以盡己。恕以待人。三曰。不道人訛。思己不信。以謂人之氣質。有萬不同。而其造道之方。亦各回其材。教戒之目。固非三條之所能盡。然予生所以為學者。不在於茲。則外雖可觀。而不足為學。欲與同爨之徒。相共講磨也。又策問諸生曰。受於外者。未必與己相干。存於內者。固為在己之實。而爾汝之言。人猶不受。而遂非。自飾譎詐。萬變可。

恥甚焉同斯心也有於彼而無於此何哉又問曰比
干諫而死孔子稱其仁後世諫而死者多矣皆可以
為仁耶若謂其事雖忠而其他或未仁則比干之仁
果不在於諫死而以素行之善耶記者何不舉其事
而後記夫子之言耶又曰學者要去俗習俗見未免
俗習俗見則雖有善志不為之陷溺者鮮矣俗習俗
見固非一端請諸君一一擇之其自治精切導人諄
悉大率如此後以辛未之春適于東武寓于輪王一
品親王宮日參預文學思顧甚渥王請水戶侯日給
廩粟今茲丙子六月乞假退休于洛途得河魚之疾

調理不驗竟不起享年四十八歲嗚呼惜哉其將歸
也留別諸友曰宦遊六載欲還京又有親朋無限情
惜別歸思方寸裡兩般相餞意難平蓋絕筆云君姿
宇魁秀儀觀端嚴談說精詳最解服人有以繁言扣
君者君為一辨必心服焉且善書兼解釋氏之書旁
通醫藥淹病滯疾宿醫之所不能起者往往奏效親
朋延致獲活最多然不以此少資其業確乎有執不
為毀譽窮達之動念素有智慮親黨之間有事之難
處者必請君裁畫君為周旋事皆辨治大為親友之
倚賴平生不必讀書不必屬文見人務記覽泥浮文

者必痛抑焉然剖析文義甚精詳得當而不苟焉而自是其學大旨主立誠以中庸明善誠身為其要旨嘗著學說上下篇大意以為善者謂惻隱羞惡恭敬是非之心人人所固有之善也明者謂擴而克之使盛大光明也誠身者謂其所為之善純一自然無一毫著意容力於其間也誠者聖人之至也聖人人倫之極也故欲明人倫則不可不致其極焉因以立所自號可謂有為者也使假之年吾道其不孤乎其將沒之日予往問疾體羸神索言噤氣喘見予來作氣扶起曰幸哉來也予訣死將囑子曾子曰鳥之將死其

鳴也哀人之將死其言也善忽以予不肖而易予言夫壽不貳脩身以俟予不愧斯言矣予有一弟不達世故賴公等扶助使無顛濟幸矣一妻尚弱予死擇良配嫁一奴多年勤勞吾未酬之無使其失所然此皆世俗之言若子素承家學衆所矜式而年尚壯戒勿惰窳勿託道義以流俗學至命之窮達非所較也蓋予生使予一志於實學至此亦云回執手揚言曰此手一分自此永訣季布尚重一諾猛省奮迅戒勿悠悠先生著古義書以惠後學粗有疑難欲就質問今且弗及吾解論語以述臆見既至八佾篇吾死以

此見呈若有可採死且不朽無復佗語時日已加未
 是夜再往問疾則氣息奄奄視死如歸脫然無思故
 親朋來聚者皆面計後事而不諱也越翌日十七日
 辛未卒明精爽不亂端坐而終噫時元祿九年丙子
 秋七月也平生所著有論語國語解伐柯篇聖教錄
 皆國字書及詩文若干篇娶井上氏久也之女乃大
 人之侄女也無嗣弟成材業儒有立掌後事乃葬于
 郊西上品蓮臺寺大慈院先塋之側既襄事請予誌
 世系學行之大端鏡諸鋤版以埋墓隧是歲冬十有
 一月日南至

廣岡妻太田原氏墓誌

廣岡信曹妻太田原氏名某京師人也信曹世家于
 豐州府內嘗在都遂歸焉信曹歸鄉閑居有年生理
 不饒有老母信曹事之有孝太田原氏奉姑事夫黽
 勉拮据百艱備嘗而不辭鄉里稱之正德五年乙未
 正月七日終享年四十六有一子名曰豐助將終處
 置後事奄然而逝信曹嘗及先君子之門頃索銘其
 墓因題之曰順敬太田原氏之墓而銘之云
 夷險一節士尚為難婦兮有恒芳聲曷刪享保
 奧州會津國宰西鄉君墓誌

君諱近方字源藏小字吉十郎源姓西鄉氏其系出于參州二連木曾祖考右近諱元房與濃州加納城主松平丹波守康長朝臣為從兄弟妣山田氏祖考新兵衛諱房茂以父故始臣事康長朝臣妣保科氏信州保科民部正近之女考賴母諱近房甫十一為舅氏正長所鞠遂冒姓保科氏正長者正近之子而為會津公族自是遂臣會津既而正長有子名正興考辭歸本宗復姓西鄉氏時□□矣正之朝臣褒其有讓別賜采地五百石妣沼澤氏寬文元年辛丑六月廿六日生于會津始事□□正經朝臣貞享三年

賜秩二百石命為近侍列番頭班明年為真元祿二年參預國務既而加祿十四年嚴父祿仍掌國務寶永三年移病辭職正德三年致仕六年丙申九月五日終于家壽五十六娶赤羽氏子男三人長曰秀有嚴秩二千石為近侍番頭次曰房成別仕秩二百石次某大女一人適熊沼澤貞通君天稟孝友溫厚慎默喜愠不形於色進退不隨於眾與人交稱善而不招惡父歿守其遺法一無所更公務之暇引接文儒樂聽其談說其蒞宦也人民悅服其既歿也莫不悼惜焉嘗承先志信奉神道從吉川氏授其秘旨既辭

職申請于□□侯。歿後喪祭之儀一依神道。既歿立謚曰守從靈社。遂祔墓于會津城東院內山口□□侯墓側。先壠之次。秀有叙其官世行治之大者。目人見徵子為銘。因銘之曰。

惟昔草昧。四郊多壘。日尋干戈。經典道否。運亨百年。風移俗美。資文資武。斯稱良士。東與之鎮。會津之府。有一武臣。其仕惟膺。崇聖信道。行遵義方。欲稽其德。視此幽堂。享保五年康子

木岐子洪墓志

木岐生名心範。字子洪。稱木工平次。別號蘭陵。產于

豐之鶴崎。世宦于肥州。嘗嗜學。上都來于予舍。今茲再上將留。受業于喜其薦志。欲與論志。講求聖賢之道。俄而感寒疾。而不起。問其年。則三十三。意可惜。夫

享保甲寅春

三重松庵墓誌

松庵翁諱貞亮。字新七。姓平氏。葛原親王十五世孫。三重周防守諱曰政。卒其後又十五世。為諱政周。乃翁之父也。世家于京兆。妣中村氏。延寶二年三月五日。生享保十九年六月十二日。沒生卒皆在甲寅歲。翁夙好學。初信新建王氏之旨。後兼從先子學枕籍。

經傳志存古道旁及百氏探其根奧不貪榮利泊如也求之于今世亦不多見之人也其親友託長胤表其墓云

本莊道聰墓誌

本莊生客歲自播州來造都問學于予未幾而歸鄉近者書來云予父名道聰祖曰道鑑父曰守正道聰生於寶永二年正月晦日今茲享保二十一年二月晦日卒于家葬于臨川寺願誌其墓聞其平素有志操存日遺囑求予之題墓則雖未相識亦同其所好者也曰書其生卒以俾鏡諸墓云

童覺源墓銘

正德三年癸巳十二月廿九日泉州佐野邑人食野氏之子庄太郎殤于痘年纔十二生而英悟其伯父興隆特憐愛之將從子肄業既而矢曰丐銘嗚呼英器苗而不秀南泉之埜貞珉之壽

卓山先生清水隆閑墓銘

君諱勝政字隆閑姓清水氏其先隸上杉景勝世署武職景勝徙會津失祿寓信州松代考諱勝父妣山越氏有五子君居其季幼而喪怙鞠于舅家既長遊江戶師宗仙院隆菴法印學醫既成事水野隼人侯

屢奏奇功，益俸至二百五十石。娶都筑氏子男一人，曰安道。女三人，長適海老江重良，次適二見寬，方次夫孫男一人，尚幼。君天資嚴毅，訓督子弟各成其材。好施愛，客多貯，典籍什器，克立其家。常命童僕除庭宇，修屋舍，以自適。享保十年乙巳正月三日，疾既危，薦召安道等，囑後事，戒其竭忠誠，克酬主恩。七日丑刻，安然而逝。年七十四，墓于女鳥羽山，號卓山先生。安道及予先人之門，使予銘其隧云。

光厥先業，後葉流芳。仁術弘施，澤覃一方。全而歸之，宅茲崇岡。
享保十年歲次乙巳春三月

謙光先生碣銘

先生諱維，文字宗哲，姓緒，方氏。出自佐伯世家，于京曾祖考道，柏祖考宗，柏考宗中府君諱惟直，字八左衛門，妣妙中孺人，中村氏。有五子，先生其長也。以正保二年乙酉八月三日生，幼而天賦穎邁，人稱英器。及長，從活所老圃垣庵諸老遊，兼學于先子。詞翰並妙，才學超倫，遂為土佐侯所聘，掌文學講讀事。每侯在國間，年赴任，歷事三主，出入四十餘年，眷待彌篤。俸秩有加，娶秦氏，子男四人，女一人，皆夭。季子維集，享保七年壬寅七月八日病卒于家，享年七十八，墓

于妙顯寺先堂之側先生平素謙和不與物忤與人
 交克有終始嘗以木鐘自號取其不鳴也既歿也維
 集請私易名諸友議曰謙光先生遂託子銘墓隧云
 夙從師友就其規程壯仕雄藩官業有成謙而益光
 木鐘曷鳴鬣封三尺爰託其名享保八年癸卯七月日

竹田道圓墓銘

道圓名崇俊字玄通源姓鈴木氏父曰宗矩其次子
 也母村井氏明曆乙未十月十六日生于丹州福智
 山管下宗矩宦事于松平主殿候于肥之島原鎮隨
 而往焉時年甫十五歲逮貞享中還仕寓于泉州府

中改為竹田氏業醫有時名娶同縣中谷氏生一男
 名守直享保癸丑九月九日嬰病而終享年七十九
 葬于邑東原云請銘其墓因系以銘曰
 生于丹方官于肥攻乎醫方寓于畿泉之海浩浩方
 泉之山巍巍斯名斯身方全而爰歸

田原南良翁墓銘

享保十九年甲寅冬十月五日田原南良氏卒于攝
 之大坂越明年乙卯其子瑞安遣門生造都請誌其
 墓曰惟田原氏姓橘其先有諱豐主者天武帝幸
 于伊州獻煮栗再生以協登極之上白雉中始官于

朝就邑建八幡祠曰小栗栖世貫于城州綴喜縣宇
治田原遂氏焉居南鄉又曰南氏世主管祠事其後
若干世延德中有土佐次郎信安其子曰木工允信
重居邑數世支族蕃衍或仕于王朝或隸于藩府屢
効武功世有顯人重子清安始業醫傳子宗安宗安
無子以森村氏嗣業稱宗治先君子乃宗治之弟也
初名良安夙遊京師入大醫土岐茅庵法印門習醫
後住大坂其術大行救療多驗人市于門著書若干
皆有益治術既老自號衰翁病既危薦精爽不亂與
子孫語安祥而逝卒年八十有五娶木原氏先卒有

五男三女或夭或廢疾予乃第五子也季曰忠泰嗣
竹内氏云嗚呼自白雉御宇至今千有餘年達官貴
人烜赫一時者不可勝載而其後裔似續不斷者亦
幾人哉田原氏歷數十世顯晦不一而尚能占其舊
業庇其族人非其先之克為可繼而其後之不失世
守豈能然乎因銘之曰

世澤千年祚胤繩繩乃心王室武功爰興惟翁治醫
其良折肱有隆者碣潛德爰徵

壺井鶴翁墓銘

君諱義知字安左衛門姓源壺井氏號鶴翁攝州浪

華產也家于京師夙好讀書尤諳本朝典故從學百
 餘人著讓亦富享保十年被召東上恩賚有加二十
 年歲在乙卯十月廿四日卒于家享年七十有九葬
 于城東清光寺其子氏房求予銘其墓因系之詞云
 生乎今世而稽乎古時處乎閭里而諳乎朝儀從其
 所好口授筆遺享保二十年歲
次乙卯十一月

垣內恂齋墓銘

籍貫南服兮肄業華京研磨終身兮非以于榮歸
 其塋兮乃圭功成誰謂不壽兮亦匪虛生乙卯
臘月

墓表類

文節先生墓表

士之尚志居業將以有為於時而弗遇焉命也老死
 巖穴泯然固聞固無所悔其或誦古之道以告斯人
 亦可以不負所學矣昔先君子之倡道當時升堂入
 室者人自淬勵言必稱古莫不以聖賢自期于今已
 六十餘年矣或故或耄或隨其志而講習多年老而
 不倦者吾見浮山子焉初西谷翁東來服先人之名
 行遠老就學倡率後輩奇浮山子弱而夙成且有姻
 勸俾從學浮山氏及門稟其指畫體究惟至草定古

義諸解多其所授既壯州郡時有徵聘而不諧退而下帷授業者三十餘年弗以寒暑勞逸而輟也四方之負笈上都者以為歸著錄數千有所造就嘗著四書通解旁及經傳諸書校訂精詳今茲享保丁未六月十日以疾終于家享年七十其嗣直方門生若干人叙其世行之大畧屬予曰諱義方字正佐產于京師姓中嶋氏彌浮山考諱宗隆妣岩木氏幼喪怙恃為外族西谷氏所鞠既長孝養數年不異所生及歿服喪克盡其禮平素勤儉自持不忽細故幹理有方家道克修配西谷氏道室翁之女也子男二人殤

女子三人其妻平野直方直方遂冒姓為嗣次皆先卒既歿門人私謚曰文節先生遵遺命葬于乙訓郡寺戶村後岡因策其事表之于幽堂云

享保十二年丁未陽月

安原仲武甫墓表

自古士之處畎畝之中樂聖賢之道雖未必志伊葛之業其淳素愿懇斥浮華而務本實亦豈不聖人之所與乎昔竇從周之於考亭董漫之於新建皆業稼圃而振衣升堂先子每稱其志之篤而恨其名之不傳也江之安原翁其庶幾乎初慶元之際喪亂方息四方之士稍知嚮學而踐履之工尚闕焉時中江子

隱居江西邑曰小川專倡新建之道人稱薦行君子其書院尚在翁世居南市與小川地相接也共屬高島縣私泚其道誘進後生遺風餘俗恂恂如也翁諱小治字仲武稱淺右衛門父曰孝光母田原氏幼而孤鞠于伯父伯正之家踰月而伯正亦逝相其遺孤以克有立伯氏家世掌邑事翁常代任其職克理翁天性溫厚謙卑自牧好學豐豐不倦晚年兼治醫術人稱其能乃至書算衆技靡不綜練常誡子弟曰汝曹為學須要求其放心寧失不文慎勿流於俗學其所立蓋如此要熊谷氏子男二人長曰貞平嗣伯父

伯照業次以義平為嗣女二人早藤氏原田氏其婿也享保十七年壬子十一月初六日卒于家享年六十四墓于村南滿願寺故趾先塋之左貞平嘗從予受業今事松平侯于信之上田掌文學事近寄書並行狀曰願有以碣于墓也予嘗遊其邑而熟其為人蓋其天資之美既知為學之有益學力之所至亦能著之於行何可弗記之以風勵來世耶於是掇其大者俾鑣之墓上去明年癸丑長至日誌

一閑翁墓表

一閑翁姓井上氏其父宦于備州池田侯家後有故

蘇祿居曰州翁生于曰州嘗慕吾先子之道上都聽
 予講經者有年矣比日久不相見也頃有人傳是歲
 六月三日疾終于僑居嗚呼痛哉終身不室在京無
 期親之扶持親友營其後事遵其遺囑俾予碑其墓
 云平生嗜酒衣巾服御凡隨身物色必尚紅碑之形
 制亦其所好也豈所謂昏冥之逃者耶而亦知尚聖
 賢之道則固非遊方之外者也問其卒年則六十一
 云享保五年庚子七月日

碑陰類

宇都宮生碑陰銘

君諱知方字文藏姓宇都宮氏防州之產遜菴先生
 之孫也隨父文甫遊學在京材而嗜學將繩祖武今
 也夫噫時享保三年戊戌九月廿六日也享年二十
 二因銘之墓云

書文英先生碑陰

文英先生名重於搢紳之間招致就問多所矜式前
 中納言從二位勳光卿為撰其碣銘參議左大辨光

祭卿書并篆額其子弟屬子記其由于碑陰云

善達氏先碑陰

予之與善達氏別已垂二紀矣杳無音耗日者書來請心其先碑草已而勒之于堅珉于攝微予題其背嘉其客寓佗邦不忘桑梓之懷為書數字詩云明教不窳有懷二人善達氏其有焉

中祿宮主神前錄

紹述先生文集卷之十四 終

